

澤州府志卷之四十

寓賢

晉周處字子隱陽羨人少負力馳騁人患之以比較虎旣而改行見二陸爲吳左丞入晉擢御史羗人齊萬年反命率師往討道澤軍行不擾人懷其惠與羗力戰死謚孝侯子圯靖札扶柩權葬周村著有默語及風土記

唐李靖三原人武德間突厥寇太原靖爲總管將兵禦之駐師松嶺山令嚴無所侵掠民感德建祠嶺上至今祀之崔信明青州益都人博聞彊記下筆成章大業中令堯城竇建德招之不屈去隱太行山貞觀中應詔舉終秦川令岑參南陽人幼讀書王屋山之青蘿齋有思舊齋詩秦畧邵陽人神龍中任淄川令陞高華尉卒葬陵川

澤州府志

卷之四十

寓賢

一

徐彥伯兖州瑕邱人名洪以字顯七歲能爲文結廬太行山下薛元超安撫河北表其賢對策高第調蒲州司兵叅軍時司戶韋暲善判司士李亘工書而彥伯屬辭時稱河東三絕後移蒲州刺史以近畿上南郊賦一篇辭致典縟歷太子賓客開元二年卒彥伯秉筆累朝後來翕然慕倣張彥珩字九如洛陽人遭變奉父與箕僑寓高平之辰堰村後占籍于此地鄉會登第官布政致仕謙冲自處與邑人聯婚媾遂成土著

薛僅字冲用漢御史大夫廣漢後自沛居河七世祖辨僅拔萃起家開元二十年將巡潞藩擇才能俾宿儲供以左拾遺爲屯留令在任七年乃居於高平山別業屯留民懷之徐季鴿爲撰屯留令薛公善政碑

申環金成郡人咸通間徙陵川縣北之蒲水村養性閒居無
縻爵志卒葬村西陽山下有題其墓者曰可惜荆山玉沉
埋曠野間

張誨其先世居清河祖嘗爲和川令因家焉誨復徙居高平
自號拙菴以文學名世專經術富篇韻所交多一時鴻儒
居鄉不苟人胥稱之

宋李常侍福王之後家隴西成紀縣五代時爲澤州守遂占
籍高平善治生勤于農桑與傭奴力作不少懈退休卽讀
書鼓琴以修其家學事親處兄弟教子皆盡其道敦尚行
誼遠近慕之五府連辟不就年九十三卒葬董寨村

金元好問遺山太原人七歲能詩隨叔父陵川令泰於官受
學郝天挺六年業成下太行趙禮部閑閑見其詩謂可繼

澤州府志

卷之四十

寓賢

二

杜甫京師稱爲元才子後過澤州有高平道中望陵川詩
云書郎零落頭今白腸斷荷衣出拜時尋請修金史方闕
館會有沮之者不果乃構野史亭采摭遺事汗牛充棟輯
金源君臣言行錄書未就而卒郝文忠經志其墓稱爲蘇
軾黃庭堅後一人初以興定進士歷南陽內鄉令終左司
員外人翰林知制誥金亾不仕

王謙并州人少沉靜有志操是非喜怒不形於色後隨母氏
至高平愛其山水因家焉受學翰林學士王晦元經釋典
九流七畧皆所旁通以子貴封朝列大夫卜築西山直躬
化俗有太邱遺風

徐貴字仲平雲中人卜隱陵川

元王勵平陽進士性狷介工詩善書避亂隱太極觀行客來

謁者輒與爲聯咏無倦色時目爲通隱

田輔渭南人至正間官四川行省叅政尋歸隱明初辟官不就僑居陽城河北里子孫並以儒術顯

魏增通許人中興判官至正末避兵鳳臺里數年天下定始去留田供廟祀里人鐫石以紀其義

明趙民望浙江人登元末進士第明洪武初自西歸道陽城遂僑寓數載博洽淹雅邑壇廟碑碣文多出其手教諭郭輝其門下士也每奉其言以式多士

張恂陝西涇陽人進士因闖亂潛避高平遨遊山谷以嘯咏自適

桂文芳燕山人元時族多權貴明洪武初授沁州學正力學勤訓士人宗之後占籍千沁

澤州府志

卷之四十

寓賢

三

舒聲江南人寓高平米山以潞安籍登鄉舉

宋翦城武人進士避闖亂徙居高平辰壩村不樂仕進翛然有出塵之想

國朝姚恭海豐進士順治初仕冀南道會姜瓖叛其將張斗光陷澤迫恭降不從死之子孫遂家焉

韓在咸陽人前中書文行並高闖亂僑寓陽城數年四子俱以功名顯在淡然無驕貴色

補

田陶唐雄陶方回續牙伯陽東不訛秦不宇靈甫路史云舜

耕于歷山漁於濩澤小大悅之秀士以從七人不辟而至周旋歷濩之間爲之七友迨旣禪七人者始逃之注雄陶續牙人表作雒陶續身又作續耳

明孔思訥聖裔第五十四代洪武間任澤州學正遷平陽府

教授道出陽城以疾卒子克誠占籍西城里仕至鳳翔知
府後請有家譜免其子孫徭役衍聖公劄付今刻石家廟
陳有守字達甫休寧人山人工詩王仲房曰達甫弱冠從親
官長平一見常評事倫歸而詩名遂起見明列朝詩記有
秋日過大雲寺一首

技術

漢子輿儀長孺皆西河人馬援上馬式表曰昔有騏驎一日千里伯樂見之昭然不惑近世有西河子輿亦明相法子輿傳西河儀長孺長孺傳茂陵丁君都君都傳成紀楊子阿臣援嘗師事子阿受相馬骨法考之於行事輒有驗效長孺又見尙友錄

晉王叔和高平人爲太醫令博通經史洞識修養之道精診切纂岐伯華陀等書撰脉經辨晰最詳張仲景作傷寒論文字錯簡未易序次求得叔和彙撰始成全書見唐甘伯宗名醫傳考占籍邑之王寺村今藥碾猶存

王顯并州人景明四年公孫崇表頃蒙付并州民王顯進所獻古銅權稽之古範考以今制鐘律準度與權參合昔造

澤州府志

卷之四十

技術

五

猶新始創若舊異世同符如合規矩

北魏初織河東人好相人世祖賢之拜爲上大夫

荆浩唐末沁水人善畫世稱荆關董巨爲畫家正宗其山水節要曰凡畫山水意在筆先丈山尺樹寸馬豆人此其法也遠人無目遠樹無枝遠山無皴高與雲齊遠水無波隱隱似有此其式也山腰雲塞石壁泉塞樓臺樹塞道路人塞石分三面路分兩岐樹看頂潁水看岸基此其訣也凡畫山水尖峻者峰平夷者嶺峭壁者崖有穴者岫圓形者巒懸石者巖兩山夾水者澗夾路者壑水注川者溪泉通川者谷路下平土山者坡似土而高者阪若能辨別乎此則知山水之彷彿也觀者先看氣象後辨清濁定衆峰之揖拱列羣岫之威儀多則亂少則漫不多不少要分遠近

遠山不得連近山遠水不得連近水山要迴抱水要潏迴
茂林古寺樓觀可安斷岸頽堤小橋宜置有路處人行無
路處林木岸絕處古渡山絕處荒村水濶處征帆林密處
店舍懸崖古木根露而藤纏臨流怪石嵌空而水痕凡作
林木遠則踈平近則森密有葉者枝柔無葉者枝硬松皮
似鱗栢皮纏身生於土者修長而勁直長於石者拳曲而
伶仃古木節多而半死寒林慘淡以蕭森凡畫山水須按
四時春景則霧鎖烟橫樹林隱隱山色堆青遠山拖藍夏
景則林木蔽天綠蕪平陂倚雲瀑布近水幽亭秋景則水
天一色霞鷺齊飛雁橫烟塞蘆渚沙汀冬景則卽地爲雪
水淺沙平凍雲匝地酒旗孤村漁舟倚岸樵者負薪風雨
則不分天地難辨東西行人傘笠漁父蓑衣有風無雨枝

葉斜披有雨無風枝葉下垂雨霽則雲收天碧薄靄依稀
山光淺翠網晒斜暉曉景則千山欲曙輕霧霏霏朦朧殘
月氣象熹微暮景則山脚落日犬吠踈籬僧投遠寺帆卸
江澹行人歸急半掩柴扉或烟斜霧橫或遠岫雲歸或秋
江古渡或荒塚斷碑或洞庭春色或瀟湘霧迷如此之類
謂之畫題筆法布置更在臨時山形不得重犯樹頭不得
整齊樹藉山以爲骨山藉樹以爲衣樹不可繁要見山之
秀麗山不可亂要顯樹之光輝若能留意於此顧心會於

精微

裴元證河東人通儒術該曉圖識

宋馮文智并州人世以方技爲業太平興國中詣都自陳召
試補醫學加樂源縣主簿端拱初授少府監主簿逾年轉

醫官加少府監丞嘗隸并代部署淳化五年府州折御卿
疾文智診療獲愈御卿表薦之賜緋加光祿寺丞咸平二
年明德后不豫文智侍醫既愈加尙藥奉御賜金紫六年
直翰林醫官院東封轉醫官副使祀汾陰又加檢校主客
員外郎大中祥符五年卒
都嚮進士陵川人博學通醫徽宗時官宣議郎掌太醫院事
遠邇求診應手愈能以其術鳴

元劉致字時中河東人官翰林待制風情高簡蚤負聲譽能
篆著復古糾繆編傳世行草宗晉人而不純熟
王翼陽城人穎悟強記旁通律曆尤工詩因染疾棄進士業
精求醫術療人多奇驗著素問注疑難傷寒歌括若干卷
算術一卷詩五百篇

澤州府志

卷之四十

技術

七

李肯堂高平人巧思強記善楷書及篆籀之學有西溪法帖
傳世

明陳魯高平人少學易入五臺見老翁授開心符魯跪吞之
遂明卜筮凡陰陽九宮兵法風雨無不立應
王友古高平人博物洽聞尤精天文及九章法且布算而知
人之隱嘗集渾天歌器銅烏漏刻候風諸巧製并圖之以
爲準

程應寵州人少聰穎善岐黃術歷代醫書無不瀏覽能切脈
刻期斷生死輒中有奇疾人不知何症者注藥立起且不
擇人而療卽竄丐弗棄也手錄醫案曾官太醫院吏目
李玘高平人少以醫著後善圖緯且能煉形服氣晚年彙釋
老而一之

國朝三銅道人不知何許人諸生成周佐母病喉百藥罔效
一道人過門索蔬具見之曰喉有崇吾爲手療否且殆矣
擊所持棕扇柄出紅丸七令吞之又彈頂後吐數肉蛾蠕
蠕動旋納之袖中語周佐謝我銅三斤足矣取以付再出
失道人所在殆非世人也遂著三銅道人傳傳諸人周佐
才而有義聲高平畢振姬與之友

蘇寰字生生州人博覽喜吟囊蓄禁方會召不赴去而遯跡
終身其箋易行已意不規規先儒成說詩有達情究心六
書著訂正韵法直圖俱未行

補田宋蕭照濩澤人靖康中流入太行為盜一日掠得李唐檢
其行囊止粉奩畫筆叩知其姓氏照雅聞唐名卽棄賊隨
唐南渡紹興中補迪功郎待詔畫院賜金帶照本末見圖

澤州府志

卷之四十

技術

八

繪寶鑑第四卷

方外

古廣成子與軒轅黃帝授道於王屋有授道壇三級瑤臺是矣又有清風臺明月臺皆與帝棲游之所今虛皇殿法籙堂肖像存焉其授受之言載於仙經

西王母命元女授軒轅陰符乃破蚩尤世說王母洞卽與瑤池相連常有仙燈出没雲霄間人莫可得而測

周王子喬或云王喬卽靈王太子晉先爲葉縣令後養道於華蓋山號華蓋君有神術一日天降玉棺於堂上喬曰上帝召我耶乃沐浴卧其中尸解而去

浮邱公養道於玉陽山王子晉自緱山來王屋公與盤桓山谷間因息駕於靈都萬壽宮今有憩鶴臺存有碑紀其事

漢趙叔期學道於王屋山聞有卜者在市往見焉卜者曰欲

澤州府志

卷之四十

方外

九

入天門調三關存朱衣正崑崙期因叩請要道授以胎中記一卷拜受之後成道飛昇

稷邱君太行山下道士武帝時以道術受賞髮白再黑齒落更出帝東巡泰山君迺冠章甫衣黃衣擁琴迎拜道左止帝勿上上必傷足指及數里右足指果折帝諱之故但爲稷邱君立祠

費長房修真高平縣之南山有提壺賣藥翁日行市中入壺以憇長房見而異之禮爲師翁曰孺子可教並引壺中絕非人境遂予竹杖及縮地法數千里頃刻可至後不知所終

後漢王眞上黨人眞年且百歲視之面目光澤似未五十者自云周流五岳名山悉能行胎息胎食之方嗽舌下泉咽

之不絕房室

漢武內傳曰王眞字叔經上黨人習閉氣而吞之名曰胎息習嗽舌下泉而咽之名曰胎

食眞行之斷穀二百餘日肉色光美力並數人抱朴子曰胎息者能以鼻口噓噏如在胎之中

郝孟節上黨人能含棗核不食可至五年十年又能結氣不息身不動搖狀若死人可至百日半年亦有室家爲人質謹不妄言似士君子曹操使領諸方士焉

左慈字元放廬江人少有神道嘗從曹操出近郊士大夫從者百許人慈乃爲齋酒一升脯一斤百官莫不醉飽操怪之使尋其故行視諸鑪悉亾其酒脯矣注鑪酒肆也操懷不喜因坐上欲收殺之慈乃卻入壁中霍然不知所在後人逢慈於陽城山頭因逐之遂走入羊群竟莫知所取

毛伯達劉道泰謝稚堅張兆期皆後漢人學道王屋山共合神丹毛服之而死劉服之又死謝張不敢服捐山而去後

澤州府志

卷之四十

方外

十

見毛劉在山上二人悲愕就請道與之茯苓持行方服之皆數百歲遊行五嶽但陸仙公陶隱仙眞誥

曹魏郗儉陽城人能行導引號三百歲武帝召問修鍊法子暨陳思王輩咸調笑不之信因令辟穀百日而作止自如帝遂重之命爲方士領袖

晉王烈入太行山聞雷聲山石忽破裂數百丈中一孔有石髓流出似青泥烈取食如飴餘半以與嵇康皆凝而爲石又於石洞中見一卷素書視之不識也默識數字以語康康知之偕往輒不復見烈乃歎曰叔夜趣非常而輒不遇命也烈後仙去

唐司馬承禎洛州温人事潘師正傳辟穀道引術無不通辭去徧游名山睿宗召之引入掖廷問其術對曰爲道日損

損之又損以至於無爲夫心目所見每損之尙不能已况
攻異端而增智慮哉帝曰治身則爾治國若何對曰國猶
身也故游心于淡合氣于漠與物自然而無私焉而天下
治帝嗟味曰廣成子之言也錫寶琴霞紋帔還之元宗時
再被召詔于王屋山置壇室以居 開元中文靖天師與
承禎各就枕忽聞小兒誦經聲冷冷如金玉天師窺之承
禎額上有小日如錢光照一席逼而聽之乃承禎腦中聲
也年八十九蟬蛻去弟子葬其衣冠謚貞一先生

張果隱中條山不知其年貌如六七十許人世傳跨白驢常
往來王屋山間休則疊如紙置巾笥乘則以水暎復成驢
武后召之佯死妬女廟前開元中徵至問神仙事語秘不
傳擬降玉眞公主果笑不答屢乞還山賜號通元先生給

澤州府志

卷之四十

方外

十一

傳歸比再召已歿矣祠棲霞觀

李通敏高平人晏六世祖棄科舉學辟穀去妻子隱於西山
不入城市年逾百歲無疾終後有遇於王屋山者儀貌如
生因名山暨井爲遊仙

樂氏二女先陵川人始娠感神光而生後繼母呂遇之酷冬
月單衣見脛責採茹號於野泣血漬土產苦苗赤葉斑如
持奉母虐乃愈甚移家壺關紫團山使拾麥遺穗無所得
呼天訴相傳黃龍忽從空下御之以升迨宋崇寧間王師
拒夏乏食復聞二女顯靈飯軍賜號冲惠冲淑真人

睿宗第九女昌隆公主修真玉陽山改封玉眞道號萬華眞
人後白日飛昇事在天寶間御書碑乃萬華靈壇祥應記
普滿不知何許人太曆中遊澤潞狀若顛不拘戒行言事無

不驗嘗題潞州僧舍云泚水連涇水雙珠血滿川青牛將赤虎還見太平年人初莫喻及朱泚亂人以意解乃泚因涇州兵亂兄弟造逆乙丑丙寅寇平之兆也

北周慧遠澤州人甫六歲投曇始禪師得度武帝召對契合授法座尋退隱藏陰寺注涅槃經成擲筆云若疏合禪理筆當駐空已而果然其疏遂行入隋爲掌教釋經法師東林蓮社高賢傳法師慧遠姓賈氏雁門樓煩人沙門釋道安建刹于太行山一面畫敬以爲真吾師也遂與母弟慧持投簪受業後南適居廬山東林寺於一峯製涅槃疏因名擲筆峯又僧曇翼餘杭人入廬山依遠公初餘杭山沙門法志常誦法華經有雉巢於菴側翔集坐隅若聽受狀七年志曰汝能聽經必生人道明旦雉殞夜夢童子拜

澤州府志

卷之四十

方外

十一

曰今生前山王氏後其家設齋志方踵門兒曰我師來也志撫曰我雉兒也解衣視掖下有雉毳三後出家以掖有毳因名以翼據此則慧遠晉人青蓮寺或卽道安太行之刹錫所及因有擲筆之名李莊靖擲筆臺詩亦用雉子事今志以爲後周時僧似別爲一人未知何據

有辨載叢譚

後周王琮爲王屋令常念黃庭經六千遍未了深義罷官絕穀咽氣入洞中有嵌室石牀案上古經一軸琮再拜曰臣竊入洞天萬劫良會今睹元經願許塵目一披忽一人曰吾東極真人王太虛黃庭經吾所注授於子復與核桃大如數斗磨而服之愈疾延年子未可此更二十年期琮獲核與經而歸

芊上人修真寶岩寺端居石室猛虎自伏後坐化遺骨甚香

其徒建塔崇奉寺在太行山顛俗稱金燈寺是也

後唐大愚爲僧五音洞調演聲律能達旨要年九十餘一日別其徒曰吾將歸矣端坐而逝洞中嘗聞五音聲後人因以爲名嘗作上心王狀奏六賊表蓋教乘喻言也錄進昭宗并韻母三十字詔賜田百頃祠部牒三十八道紫衣十道有愚公塔心王表碑在金峯

洪密陽城千峯寺僧俗姓劉早皈石霜契宗旨明宗爲太尉密預識之登極後命建禪院賜衣鉢蠲田租以勅書慰問詳司空圖記

後晉煙蘿子王屋里人天福時佃陽臺道家田後得烟霞養道之訣一日于宅井傍得靈異人參舉家食之遂拔宅上昇今洗參井仙猫洞其遺跡也

澤州府志

卷之四十

方外

十二

宋二張仙公一名崇真澤州人一名道温京兆人同居州西上町社修真觀尋偕遊海島遇劉長生得其術復歸結茆於此相繼坐蛻塵同穴後數十年人猶有見者

賀蘭棲真奉仙觀道士章帝聞其道術召至京師爲詩以獻上亦製詩以答之一日問曰先生有點金術人言信乎對曰陛下聖德睿明富有四海臣願以堯舜之道點化天下方士僞術不足道也上竒其言賜號宗真太師乃蠲觀之田賦祥符三年卒年百一十有三時天大雪經三日頂猶熱人於王屋山頭見其肩挑隻履云

宋許吉過王屋山見丞相龐籍道服從三四童而行吉詢童曰此丞相龐公乎童曰然吉曰何故遊此曰公作王屋山道君治此山也

青瑣記

金姬志真高平人號洞明子皇統中遊五岳歸語所親曰人生一夢耳捨宅作觀名清夢服紫衣爲道士見觀碑
通真子姓秦名志陵川人棄應舉學道隱王屋少室間後遇披雲老人於上黨授道籙遂立局平陽元都觀校補三洞書訖倏風雷大作遂立化著林泉集二十卷

元馬仙姑永平人幼慕棲真結屋高平縣西通義村日以鍊形爲事旁產香草飛鳥不期而集一日正襟逝人每道其星冠霞帔步虛往來因立祠祀焉今董峯菴有石槲卽委蛻處

鄭楚巖沁水人通天文曆數地理學隱歷山遇異人授左慈術卧冰雪不僵縣令遣召之先召者至問世道不答強試其術乃索一瓶側身入擊碎之則了無所見已遁矣明洪

澤州府志

卷之四十

方外

十四

武初識者遇於襄鄧山中鬚髮如故就問之疾行如飛去珍講王陵川縣禮義鎮人張姓禮崇寺僧洞曉禪機後枕右股而化

明法亮姓崔氏澤州人出家靈巖寺刻修戒行嘗行脚至鍾山造藏經歸禁足三年晝夜檢誦不輟作石塔藏之

祖湯陽城龍巖寺僧日誦經巖東小石龕辛亥六月六日方誦法華忽一兔徐入龕內蹲經案前誦已三揮不去自己至申湯曰吾送汝歸路兔從出門踴躍而去白所知爲作銘識之云白兔聽經處

巖間書生上黨記太行山有箐射熊者見諸生讀書巖間及往覓則失其處人以爲神仙

田補

漢呂恭字文敬少好服食將一奴一婢於太行山中採藥

忽見三人在谷中問恭曰子好長生乎乃勤苦艱險如是耶恭曰實好長生而不遇良方故採服此藥冀有微益耳一人曰我姓呂字文起次一人曰我姓孫字文陽次一人曰我姓王字文上皆太清太和府仙人也若能隨我採藥語公不死之方恭卽拜曰得遇仙人若見採収是更生之幸也卽隨仙人去二日乃授恭秘方一首因遣恭去曰公來二日人間已二百年矣歸家但有數世孫呂習作道士推求而得耳因以神方授習而去習已八十服之卽還少壯至二百歲乃入山中子孫不復老死

金孫景元字仲遠沁水人爲靈虛觀道士以戒自持性高古博通經論學者從而受業所在雲集名動京師貞祐之變晦迹嵩洛駕幸汴梁召爲上清儲祥宮開講大師趙秉文

澤州府志

卷之四十

方外

十五

以詩敦諭之然屈節應命非本志也三年不告而去崇慶壬申請陽城臺村岱岳廟爲岱岳觀其地高爽在北臺之東北次西南曰南臺皆俯視之與其徒爲林下計年八十四道氣所養舉動健羨出入古今手不釋卷逸情遐想飄然與造物者遊人莫能窺其際也詳見鶴鳴老人李俊民碑記